



Sujet: 1994

Prost im Leuegrund

Euses Prattele isch gross nit chli
in Prattele het's viel Industrie
z'Prattele wohne vo allne Länder Lüt
und in dr'Gmeinkasse isch sowiso au nüt.

S'Finanzloch als Thema,, s'wär verchert,
und als Sujet sowieso nüt wärt,
nei, euses Sujet, do simmer stur,
handlet vome Prattler Buur,
und das, so meinemer, us guetem Grund
s'isch dr Wystübli-Beizer vom Leuegrund.

Syt langer Zyt, me weiss es gnau
Git's in Prattele dr'Wy-Rebbau,
das macht au, s'isch kei Witz
d'Famillie vom Schneider Fritz.

De Buur isch chaibe schlau
Drum sait er au zu siner Frau:
„Wy trinke, das isch gsund
no gsünder isch's im Leuegrund!“
Drum gits, s'isch fascht nid mögli
syt letschtem Oktober es Wystübli.

Me cha dört Wy degustiere
wo sie sälber düend prodiere
trinksch key Wy, s'isch maximal
gits au Kaffi oder Mineral.

Jetzt hämmers fascht no vergässe
Natürlich gits au öpis z' Ässe.
Ob Späck, Chäs oder Buurebrot
mir händ uf jede fall en Rot
d' Buurefrau isch ä liebi und ä näti
für wenig Gäld, hesch viel uf em Brättli.

Hesch z' viel degustiert, s' dörf dy nit reue
Lüt im Oriet Taxi a, es wird ihn freue
Wend betrunke is Dorf abefarsch
Bisch am Änd no am A...
die ganzi Sach heimir au nit verstande,
s' isch aber im Prattler-Blättli gschande.

Mi meine, das g'hört nit unter e Tisch,
s' isch schad das Stübli nume 3 Mönnet offe isch
wärs länger off s' würd üs freue
aber leider mues dr Buur im Sommer heue
den hesch kai Patent s' isch allerhand
het s' letschi Wort dr Kanton Baselland.

S' git sicher Prattler wo ines Beizli wänd
und s' git au Clique wo das händ
z' Prattele muesch nit lang sueche
chunsch eifach zu de Dorfplatzrueche
mer düent Euch hätzlich begrüesse
zum d' Fasnacht mit Euch gniesse.

Sunntig, wen der Umzug isch gloffe
isch euses Beizli für Euch offe.
Zum Eus finde s' isch eifach zum verschto
musch eifach hinter d' Schützstube go
duend ihr s' Beizli am Sunntig sueche
chönd Ihr uns am Cherus wider b' sueche.

Dr letscht Värs, i glaub i spinn
Handlet vo eusem Pin.
Mir finde die Wälle scho zum Lache
doch düen mir do voll mitmache
wilsch ein ha, muesch nit viel woge
eifach ein vo de Aktive froge
er wird sich freue und Dir danke
Du kriegsch en Pin, und mir 8 Franke.